



# Múte Bourup Egedes nytárstale

**Taler**

Múte Bourop Egede  
Formanden for Naalakkersuisut

**Dato**

1. januar 2025

**Sted**

Hans Egedes Hus, Nuuk

1 Asasakka nunaqqatikka,

Ukioq pisoqarluarfiusimasoq maanna qaangiuppoq, ukiorlu nutaaq aallartipparput.

5 Ukiortaami pilluaritsi – ukiumullu qaangiuttumut qutsavigaassi, neriullungalu ukioq nutaaq peqqillusi ajorasilu iserfigisimassagissi.

Ukioq nutaaq pissangalluta aamma pilersaaruteqarfigalugu aallartittarparput. Piffissamummi nutaamut periarfissanullu nutaanut ukioraaq ammaassisarpoq.

10

Tamatta ataasiakkaarluta piffissamut nutaamut appakaannitsitulli, nunarput aamma piffissamut nutaamut – periarfissanullu nutaanut maanna appakaappoq.

15 Periarfissat nutaat, siunissamut nunatsinnut pitsaanerpaamik ilusiliinissatsinnut sulisariaqarnitsinnillu pisussaaffiliipput.

Nunarsuarmioqativullu naligalugit, pingaartumik nunat ikinngutivut aamma sanilivut peqatigalugit suleqateqarneq annertusisamik inerisassallugit alloriartariaqalerpugut.

20

Nunattalu alloriarnermut tullermut ikaarsaarnissaa piffissanngorpoq. Nunarsuarmioqativummi naligalugit suleqateqarnissamut aporfivut aamma nunasiaataasimanerup kalunnerisut taasinnaasavut qaangerlugit ingerlariaqqittariaqalerpugut.

25

Oqaluttuarisaanerup takutippaa aamma ulloq manna tikillugu takusinnaavarput Kunngesarfik Danmarkimik suleqateqarnerput aaqqissuussaaneq taamak isikkoqartillugu, tamakkiisumik naligiinnermik

30

pilersitsisimanngitsoq. Inatsillu tunngaviusoq danskit inatsisaat,  
aallaaviujuartillugu naligiimmik suleqatigiittoqalersinnaanngitsoq.

35 Uagut nammineq siunissaq qanoq ilusilissallugu aamma kikkunnik qanimut  
suleqateqarnissamik niueqateqarnissamillu alloriarnissarput piffissanngorpoq.  
Suleqateqarnerimmi niueqateqarnerillu tamatigut Qallunaat Nunaat  
aqqutigeqqaarlugu piuarsinnaanngillat...

40 Ukiuni kingullerni Inatsit tunngaviusoq, danskit inatsisaannit  
kaanngarnissamut toqqammavissavut Inatsisartut Naalakkersuisullu  
suleqatigiillutik alloriarfigisarsimavaat.

45 Inuiaat kalaallit namminersorsinnaatitaanerat Kalaallit Nunaanni  
Namminersorneq pillugu inatsisikkut akuerineqarpoq taamaalilluni  
namminersortuunerup qanoq anguneqarsinnaanera inatsisitigut  
aqqutissiorneqarpoq periarfissaavorlu.

Maannamullu inatsit tunngaviusussatut nunatta inatsisissaanut missingiut  
piareerneqarsimavoq. Nunattalu namminiilivilluni naalagaaffinngornissaanut,  
50 Namminersorneq pillugu inatsimmi periarfissaliunneqarlutillu  
toqqammavilerneqarsimasut aallaavigalugit alloriaqqinnissamut piareersarnek  
suleqatigiissitaliornikkut aallartinneqarsimalluni.

55 Alloriarnerit annertuut pisariaqalerput, soorunami isumatusaartumik  
tunngaveqartumik alloriaqqinnissanilu tamani oqartussaasut aaliangiisussallu  
tassaapput innuttaasut, inuiaat kalaallit.

60 Qinigaaffillu nutaaq aggersoq tassaasariaqarpoq innuttaasut peqatigalugit  
alloriaqqiffiusariaqartut qanoq ilusilernissaannut aamma siunissami  
aaqqissuussaanerup qanoq ittup siunnerfiginissaanut tunngaviliiffissaq.

Nunattami ineriartornera nutaaq aallartikkaluttuarpoq.

65 Nuummi mittarfissuup ammarneqarneratigut nunarput nunarsuarmut aatsaat  
taamak annertutigisumik ammarneqarpoq.

Ukioq manna aasaanerani nunatsinnut, nunanit assigiinngitsuniit  
toqqaannartumik tikiinneqartalertussaavugut, qallunaat nunaat

70 aqcutigeqqaanngikkaluarlugu. Taamaalillutalu nunatut namminerisamik  
aqutatsinnik inerisariartorsinnaanngorluta.

Nuummi mittarfik assartuinikkut angallannikkullu alloriarneq siulliuvoq.  
Tullinguupput Ilulissani mittarfissaq aammalu Qaqortumi mittarfissaq.

75

Attaveqaasersuutit pitsaasut eqaatsullu tassaapput ineriartornermut  
toqqammaviliisartut. Niueqatigiinnikkut, inuussutissarsiutit nutaat  
inerisarnerinut, takornariaqarnikkut minnerunngitsumillu inuit akornanni  
attaveqaqatigiinnikkut.

80

Attaveqaasersuutitigut pitsanngorsaanerit tassungaannaq killinngillat.  
Tullinguupput Ittoqqortoormiini aammalu Tasiilami mittarfissat  
suliarinissaat.

85 Misissueqqaarnernut aningaasaliissuteqareerpugut suliarineqarnissaannullu  
toqqammavissat suliarineqarnerat aallartereerluni.

Taakku piareerpata kitaani illoqarfinni minnerusuni suluusalinnut  
mittarfeqanngitsunut mittarfiit inerisarnissaat aamma ingerlanneqassaaq.

90

Naalakkersuisuniit siunniussimasagut timalernejareersut timaligassallu  
toqqammavissaat suliarivagut. Mittarfiit periarfissanik ammaassipput tasanilu  
periarfissanik piviusunngortitsineq Nunatta ineriartorneranut  
toqqammaviussapput.

95

Toqqammaviit ilagisussaavaat avatitsinniit tikeraartoqarneq. Takornariat  
Nunatsinnut kusanarluinnartumut tikeraarnerat nuannersuujuartussaassaaq.  
Taamaammat Takornariaqarnermut Inatsit Naalakkersuisuniit  
siunnersuusiarisimavarput Inatsisartunillu akuersaarneqarluni.

100

Inatsisip takornariaqarnerup nunatsinnut tulluuttumik ineriartornissaa  
aqcutissiullugulu sinaakkusissavaa, nunatsinni innuttaasut aallaavigalugit.

105

Piujuaannartitsineq tassaannaanngilaq avatangiisitta paarinissaat taassaavorli  
aamma inuiaqatigiit kalaallit siunissami namminerisamik siunissaminnik  
aqutsisuunerannik qulakkeerinnineq.

110 Takornariaqarnermi ingerlatsineq nunatsinnut tulluuttoq aqunneqartorlu  
siuarsarnissaa inatsimmi qitiulluinnarpoq – avatangiisinut inuinullu.

Takornariaqarneq annerusumik inuussutissarsiutigisariaqarparput  
minnerunngitsumillu inooqataaffigisinnaasariaqarparput.

115 Nunatta killeqanngiusattumik aqunneqanngitsumillu  
angallavigineqannginnissaa inatsimmi qulakkeerneqarpoq. Kommunit  
peqatigalugit nunatta qanoq kikkunnillu atorneqarnissaanut  
aalajangersaasussanngussaagut taamaalilluta nammineq inooriaaserput  
illersuutigalugu tikeraanut avatangiisigut alutornaqisut kusanartumik  
120 nittarsaassinnaajumallugit – nunatta inuisa aqutaannik.

Assartuinermi nutaamik aqqissuussinitsinni, inuussutissarsiutit pioreersut  
inerisarneqarnissaat aammalu periarfissanik nutaanik pilersitsisinnaanissaat  
aqqutissiuunneqarportaaq. Nunatsinni inuussutissarsiutit pingaarnersaat  
125 nutaanik periarfissaqalerpoq.

Aalisakkat imaaniit qaqqinneqarnerminniit qaammatit arlallit assartorneqaratik,  
ullulli akunnerillu ikitsunnguit iluini pisisartunut anngunneqarsinnaanerat  
ammaanneqarpoq.

130

Periarfissamik atuilluarneq ilinniartussaassavarput  
misilittaavigisariaqassallugulu. Qularutiginnigilarali aalisagaatitta imaani  
minguitsumi pisarineqarsimasut, iluatsilluartumik pissarsiffiulluartumillu suli  
annerusumik niuerutaalerumaartut.

135

Imartatsinni pisuussutigut inuaqatigiit tamatta pigaagut. Pisuussutitta  
inuaqatigiinni iluaqutaanissaat Naalakkersuisuniit siunissamut  
aalajangiisuulluinnartutut isigaarput. Tamanna pillugu Aalisarnermut Inatsit  
nutaq ukiorpassuarni eqqartorneqareersoq naammassillugu suliarisimavarput  
140 Inatsisartunillu amerlanerussuteqartunit akuersisutigineqarpoq.

Aalisarnermut Inatsimmi qitiulluinnartoq tassaavoq, pisuussutinik  
piginnittuunerup naqissuserneqarnera – tassaasullu inuaqatigiit kalaallit.  
Pisuussutinik piginnittussaaneq kisimi qulakkeerneqanngilaq. Imartatsinni  
145 pisuussutinik atuisinnaaneq kikkunnit ingerlanneqarsinnaanersoq aammalu  
ingerlatsinermi piginneqataasinnaanermut maleruagassat

ersarissarneqarputtaaq.

150 Qulakkeerneqarpoq imartatta pisuussutaasa siammasissumik  
atorluarneqarsinnaanerat, eqaannerusumik aalisartunngorsinnaanermut  
periarfissiineq minnerunngitsumillu eqaatsumik aalisarnerup  
aaqqissuunneqarsinnaanera. Imartatsinni pisuussutit inuiaat kalaallit pigisaat  
nammineerlutillu aqutaminnik aningaasarsiorfissaat taamaalilluni  
155 qulakkeerneqarpoq.

Ukiuni tullerni aalisarnikkut allannguinerit, nalimmassaanerit aammalu  
inerisaanerit ingerlanneqarsinnaanngorput kingulissatsinnut  
qulakkeerinnittussamik.

160 Suleriaatsit iliuutsit sinaakkusiunneqartullu tamaattussaannartut  
isigineqalersillugit ilaatigut ineriartorfissaagaluit killilersorneqalersarput.

Ukiuni kingullerni taamaattussaannartut isiginninnerit  
165 unammillerniarsimavagut taamaaliornitsinnilu Inatsisartuni partiit tamatigut  
suleqatiserisarsimallutigit.

Politikkikkut siammasissumik isumaqatigiissusiornerit ilaatigut  
iluatsilluartarsimavagut tassuunakkullu siammasissumik tunuliaqutalimmik  
170 inuiaqatigiit ingerlanneqarnerata allannguiffiginissaa toqqammavilerlugu.

Suliffeqarfiutitta ingerlannerinut politikkeqarneq siammasissumik  
toqqammavilik suliarisimavarput, peqqinnissaqarfiup suli annerusumik  
pitsaannerusumillu kiffartuussisinnaanera qulakkeerlugu isumaqatigiissut  
175 suliarisimavarput, akileraartarnermut isumaqatigiissut suliarivarput,  
utoqqalinersiallit siusinaartumillu pensionisiallit pilersueqatigiittussaaitaanerat  
atorunnaarsinneqarsimavoq, ineqarnermullu iluarsartuusseqqinnissamut  
isumaqatigiissut naammassisimallugu.

180 Politikkkikkut isumaqatigiissutit qinigaaffiit akimorlugit isumaqatigiissusiaapput  
inatsisiliornitsigullu tullerriaaraluta maanna piviusunngortikkiartorlutigit.

Maanna Naalackersuinikkut pisariaqartitarput tassaavoq assigiinngitsumik  
isumaqarnigut akuersaarlugit, naaperiaasinnaanerput annertusassallugu,  
185 assigiinngissuseq kisiat aallaavigalugu nunatsinni siuariartorsinnaanngilagut,

suleqatigiillaqqissusermilli takutitsinikkut siuariartorneq tamatsinnut pitsaasoq angusassaraarput.

190 Nunarput nunarsuarmioqatitsinnik soqutigineqaqaaq, Kalaallit Nunaalli inuiaat kalaallit pigigaat maanna naqissuseqqikkusuppara. Nunarsuarmioqatitsinniilli suleqateqarnissamut niueqateqarnissamullu suli ammassaagut, pingaartumik nunat sanilerisavut eqqarsaatigalugit. Tamannalu  
195 iluaqutiginnissaa Naalakkersuisunit sulissutiguarparput.

Nunatsinnik suleqateqarneq nunatta iluaqutigissavaa aamma suleqatitta iluaqutigissavaat, uagulli suleqatigineqartilluta naleqartitagut tunngavingalugit suleqateqassaagut.

200

Nunarsuarmili pissutsit najummatsisimanarput, nunat pissaaneqarniuunnerat piviusuuvoq nunarsuarmilu pissutsit ukiuni kingullerni toqqissisimananngillat, inoqatigullu nunarsuarmi akerleriinnerit toqqammavigalugit ajoraluartumik inuunerliortinneqarput.

205

Nunarsuatsinni toqqissisimanerusitsinissaq pisariaqarpoq, nunat akunnerminni oqaloqatigiinnikkut qaangiiniarnerusinnaanerit pisariaqartinneqarpoq, nunattalu kissaataa tassaavoq nunarsuaq toqqissisimanarnerusoq. Nunarsuarmioqatigiit akunnerminni aammali  
210 nunatsinni isumatusaartumik siunissap ilusilersornissaanut tamanna pisariaqarluinnarmat.

Toqqissisimanissaq tamatsinnut pingaaruteqarluinnarpoq. Inuiaqatigiittut, ilaqutariittut inuttullu ataasiakkaatut.

215

Ulluinnarni atukkat katinnerat toqqissimatitsinermik pilersitsisarpoq; sulinitsigut, ataatsimoornitsigut, meeqqatta periarfissaqarluartinneqarisigut minnerunngitsumillu nuannersumik toqqissisimanartumillu angerlarsimaffeqarnitsigut.

220

Ukiorpasuarni inissiat aserfallassimanerat oqallisaasarsimaqaaq. Inissiat aaqqissuunnissaannut kinguaattooqqaneq annertusiartuinnarsimavoq ilaatigut inissiaatitta aserorluinnarnerinik kinguneqarsimasumik. Naalakkersuisunimi misissuinerit ilaanni paasivarput nunatsinni innuttaasut nunatsinni

najugaqaannarusussagunik pingaarnarpaatut kissaatigisaat tassaasut inissiat  
pitsaanagerusut aammalu peqqinnissaqarfiup pitsaasuunissaanik  
toqqisisimatitsiviusumillu sullissinissaanik kissaateqarnerit. Taamaattumik  
Naalakkersuisuniit inissiat pisortat pigisaat aaqqissuussiviginissaat suliaralugu  
230 aallartipparput. Tassanilu politikikkikut siumut isigisumik  
isumaqatigiissusiorsimalluta. Isumaqatigiissummi siunertat pingaarutillit  
arlarparput. Inissiat tullerriaakkamik nutarsarnissaat aallartinneqassaaq aammalu  
inuit nammineerlutik inigisaminnut piginnittuulernissaat siunertanut ilaalluni.  
Naalakkersuisuniit nalunngilarput ilaatigut suliaasaq nuannersuinnarnik  
235 imaqaangitsoq taamaattorli kinngulissatsinnut nammatassiiniangikkutta  
akisussaassuseqarluta iliuuseqartariaqarpugut.

Inissiat attartortakkat aaqqissuunneqarnerannut atatillugu  
akiliutigineqartussa q nalimmassarneqartussaassaaq akiviusoq  
240 akilerneqartalissalluni tassanilu aserfallaatsaaliinermut ileqqaarutissat  
ilangullugit nalimmassarneqassallutik. Tamanna iliuuseqaangikkutta  
ilaqutariinnut aningaasatigut kinguneqartussaasoq Naalakkersuisuniit  
eqqummaariffigaarput taamaattumillu ilaqutariinnut isertitakinnerusunut  
akunnattumillu isertitalinnut tapeeriaatsit tulluussarneqassapput  
245 taamaaliornikkut inigisamut akiliutit akiliisinnaassusermut  
tulluussarneqassallutik. Tapeeriaatsit akiliutit allangortinnginneranni inatsisit  
allangortinnerisigut suliarineqassapput.

Ineqarnermut akiliutit akinillu assigiinngitsunik nalimmasaaviginissaat  
250 nuannersuusangikkaluartut, politikikkikut akisussaassusilittut aaliangigassat  
pingaarutillit aaliangiiffigineqartariaqartarput. Nuannareqqusaaginnarlunimi  
innuttaasullu tusaarusutaannaat tunngavigalugit ingerlatsisoqassappat  
nunatsinni qaqugu naalagaaffinngussagatta immitsinnullu napatilerluta?

255 Taamaammat akisussaaffik tigullugu aaqqiissutissanik tikkuussineq  
pitsaanagerpaaq aallaavigalugu Naalakkersuisuni sulinerput qinigaaffimmi uani  
ingerlassimavarput.

Siorna ukiortaami oqalugiaatinni akileraartarnermut aaqqissuusseqqinnissamut  
260 atatillugu oqariartuutigaara, nunatsinni akileraarutip appartinnissaa  
siunertaralugu Naalakkersuisuni sulissuteqarniartugut. Misissuilluarnerit  
aaqqiissutissarlu pitsaanagerpaaq, innuttaasunut amerlanerpaanut  
iluqautaasusaaq toqqarsimalerparput.

Taamaattumik Naalakkersuisuni sulinermut ilannga atorgulugu ilaqutariippassuit, sulisartut, meeqqerisorpassuit, fabrikkini sulisorpassuit pisiniarfinnilu sulisorpassuit tassa sulisartut 24.000-it missaannut akileraartarnermut aqqissuusseqqinnermi iluaqutigilluagassaannik suliaq  
270 tunngavilerneqarpoq.

Taamaasiornikkut ukiortaap aallartisimalerneraniit innuttaasut toqqaannarnerusumik iluaqutigisinnaasaannik alloriarneq siulleq pilersinneqarluni aammalu sulineq imminut akilersinnaasunngortinniarlugu  
275 kivitsinissaq tunngavilerneqarluni.

Sammiviillu tullit tassaassapput inuussutissarsiornermut akileraartarnermut tunngasut aqqissuussiviginissaat, taamaasiornikkut maani nunami suliffeqarfiuteqarnerup pitsaanerusumik atugassiissuteqarnissaa  
280 tunngavissikkumallugu kiisalu akileraartarnermi aqqissuusaanitta tamarmiusumik tamatsinnit paasiuminartunngorlugulu oqilisaaviginissaa.

Ukiut arfineq marluk missaat qaangiupput Inatsisartuni partiinit tamaniit akuersissutigineqarmat utoqqalinersiaqarnissamut katersisussaataitanerup  
285 atuutilersinneqarnissaa. Pisortat suna tamaat akilersussappassuk, nunarput aningaasatigut imminut nammaqatigiinngitsumik ingerlalissasoq eqqartorneqarpoq, namminerlu taamaalilluta utoqqalinissatsinnut ileqqaartalernissarput katersinissarpullu siunertarineqarluni taamani Inatsisartut toqqammavilerpaat.

290

Siunertaq tunngavimmini ajunngitsorpassuaqaraluartoq Naalakkersuisuniit isumaqarpugut tamanna naleqqussaavigeqqittariaqartoq. Taamaattumik aningaasanut inatsimmi akuersissuteqartut isumaqatigiissutigivaat, 2025-mi inatsisip arlalitsigut naleqqusaaviginissaa. Soorlu skatikortimi  
295 procenteerutaasartup annertussusia aammalu inuusuttuaqqat ukioqqortusereersullu ileqqaartussaataitanerat kiisalu marloqiusamik akileraartarnermut tunngasut aqqiivigineqarnissaat suliarineqassalluni.

Ukiuni kingullerni nunatsinni aanngajaarniutinik atuinerit annertuut kiisalu  
300 aanngajaarniutit sakkortooujussuit takussaleraluttuinnarnerat akiorniarlugu sakkortusisamillu iliuuseqarfiginiarlugu Naalakkerusiooqatigiit suliniutinik arlalinnit ingerlataqarput. Ilaanngaaserisut amerlissapput aammalu



atortorissaarutit sakkussat ilinniartinneqarnerinullu tunngasut  
305 annertusarneqassapput. Inuiaqatigiinnimi aanngajaarniutit inuiattut  
nukillaarsaanerat tamatta akiorniarlugu suliaqartariaqarpugut.

Meeqqat atuarfianni periarfissiissutit inerisartuarnissaat pisariaqarluinnarpoq.  
Inuunermut ilinniarnissamullu tassaammat toqqammiviliisut pingaarnersaat.  
310 Meeqqalli atuarfiini atugassarititaasut assigiinngisitaarpallaarnerat  
Naalakkersuisuniit pitsanngorsaaviginissaat pingaaruteqarluinnartutut  
isigaarput. Ilinnialersussanut periarfissat aqqutissallu Naalakkersuisuniit  
suliarisimavagut ilaatigut ilinniaqqinnissamut piukkunnarsarsinnaanermullu  
periarfissat pitsanngorsarnerisigut. Illoqarfinni arlaqartuni Pilersitsiviit  
315 aallartinneqarput tassanilu kommunit qanimut suleqatigalugit inuusuttut  
atuagarsornerinnaanngitsumik kisiannili assassornerullutik ilinniarnissaat  
periarfissaalerpoq.

Ilinniarnarit piukkunnarsarnerillu tamarmik inuup nammineerluni  
320 pilersorsinnaaneranik periarfissiisuvoq. Aammattaarli inuiaqatigiinni  
atugarissaarnitsinnut toqqammaviliisuulluni.

Taamaattumik Naalakkersuisuniit inuussutissarsiutit siammasissumik  
inerisarneqarsinnaanerat toqqammavilersorniarlugit ukiuni kingullerni  
325 suliaqarsimavugut Inatsisartullu peqatigalugit sinaakktissat suliarisimallutigit.  
Aalisarnermi inatsimmi nutaami, Aatsitassanut inatsimmi  
minnerunngitsumillu Takornariaqarnermut inatsimmi nutaami nunatta inuisa  
atorluaasinnaanerat sinaakkusersimavarput Nunatsinni najugaqavissut  
salliutillugit inerisaanissaq piginnittuunissarlu naqissuserparput.  
330 Immitsinnummi aallaavigaluta nunarsuarmioqatitsinnilli aamma  
suleqateqarsinnaalluta siunissarput ilusilersortariaqalerparput.

Nunatsinni siuariartorpugut, pitsaasunik suliaqarpugut aammali  
pitsaaneruffissaqarpugut.

335

Meerartatta isummersortarfitsik Nakuusa aqqutigalugu  
saqqummiuteqqammerpaat, inuit attaveqaqatigiittarfiisigut killissamik  
qaangiisarnerit, inoqatinut mittatilliinerit pimmatiginninnerullu qanoq  
tamakkunuuna ajornanngitsiginersoq. Inersimasuusugut meerartatsinnut  
340 tarrarsorfiusugut, inuiaqatigiinni amerlanngitsuni immitsikkut  
akerleriittuarternerput, pissusilersortarnerput oqalliseriaaserpullu

qiviartariaqarpagut. Killiliisariaqarpugut, killiliinngikkutta inoqatinut  
nakkarsaanerit pimmatiginninnerillu ingerlajuassapput.

345 Akerleriissuteqarnermiit paaseqatigiissinnaanermut pikkorinnerusariaqarpugut.

-

350 Inuiaqatigiinni amerlanngitsuni amerlasuutigut imigassartortoqarsimatillugu  
ajoraluartumik alianartumik pisoqartarpoq, ilaqutariippassuit imigassamik  
aanngajaarniutinillu pinngitsuuisinnaajunnarnerit ingiaqatigalugit inuupput.  
Inuttut qamuuna misigisimasat aallaavigalugit oqaasinnguineq  
aallarniutigalugu inuttut ineriartorneq imaannaanngissinnaavoq.

355 Nunatsinni ataatsimoornermik aallaaveqartumik inuusaaseqarnitsigut  
ilaqutariit alloriaqqikkusuttut aqqutissiuuttuarnissaat suliassaraarput  
aallartittariaqarlugulu. Meeqqat amerlavallaat angajoqqaaminniigatik  
peroriartornerat akuerinagu iliuusigut annertusagassaraagut. Inuunerluutit  
kinguaariinnit kinguaarinnut ingerlasut, ilorraap tungaanut saatsissagutsigit  
360 inuttut ataasiakkaatut inuiaqatigiittullu ikorfartoqatigiittariaqarpugut.  
Inuunerluutaasullu sorlai tikillugit aaqqiissutissanik ujartueqatigiittariaqarluta.  
Ataatsimoorneq tapersoqatigiinnerlu tassani pisariaqartilluinnarpavut.

Ukiuni aggersuni assaat kissalaartut pisariaqartinneqarnerat  
365 minnerulernaviangilaq. Ukiuni kingullerni atortulersuutigut  
ineriartorluarpugut, siuariartornerput pisariaqartitatsinnut matussusiissappat  
isumaginninnerup iluani aaqqissuusseqqinnissarput pisariaqarpoq. Inulerisut  
inulerinermillu suliaqartuusut tamaviaarfiupput taamaammallu  
naalakkersuinikkut isumaginninnerup iluani nutarterinissamut nukigut  
370 atornerusariaqarpagut, suliassaavoq pingaartoq pisariaqartorlu.

Ukioq manna kommuninut aammalu Inatsisartunut qinersisussaavugut.  
Qinersineq tassaavoq tamat oqartussaaqataanerannik nalliussineq. TaasinitSIGUT  
inuiaqatigiinni sammivissaq sumut kikkunnillu ingerlanneqassaanersoq  
375 tunngavilertarparput.

Qinersineq ineriartornissatsinni tunngaviit pingaarnersaraat.  
Ajuusaarnaraluaqisumik qinersinerni kingullerni taasiartortartut  
ikiliartorsimapput. Taasiartorneq taamatullu akisussaaffimmik tiguseqataaneq  
380 inuiaqatigiit atorfissaqartippaat, taamaattumillu upernaq manna qinersinissani

tamassi taasiartornissassinnik kajumissaarusuppassi, qinigassanngortittummi nunattalu tamavimmik pisariaqartippaasi.

385 Ukioq nutaaq anguniagaqarnermik neriuuteqarnermillu ingerlatsiffiussasoq neriuutigaa, kalaallimmi ataatsimuullaqqissuunerput atorlugu anguniagaqaqatigiikkaangatta nukimmik annertuumik peqartugut takusarparput, tamanna ukiumi nutaami matumani tamatta atorluarniartigu.

390 Alloriarnerit pingaartutillit siunissallu utaqqivaatigut.

Siunissarlu ersisaarutiginaagu, siunissaq periarfissiisoq atorluarniartigu.

395 Siulitta nuna avatangiiserlu kusanarluinnartoq imaannaanngissinnaasorli inuuffigisimavaat, siunissarlu upperalugu uagutsinnut ingerlateqqissimallugu.

400 Uagut maanna pisussaavugut, siulitsitulli siunissaq upperalugu tullitsinnut ingerlateqqissallugu. Nunarpummi qaqagumut pigiuassavarput, kingulittalu siunissaraat. Ukioq 2025 tassaali – nunatut, inuiattut, inuttullu ataasiakkaatut alliseequtitta qaangernissaanut alloriaqatigiiffissarput.

Nunaqqatikka nunarsuarmilu innuttaasoqatigut tamassi ukiortaami pilluaritsi.

**Kilde**

405 Manuskript taget fra naalakkersuisut.gl med tilladelse fra udgiver.

**Kildetype**

Digitalt manuskript

**Tags**

410 Nyttårstale, Udvalgte nyttårstaler fra Landsstyreformanden

**URI**

<https://www.dansketaler.dk/tale/mute-bourup-egedes-nyttarstale-2025>

415